

ТӘУЕЛСІЗДІК – ЕЛ ТҰҒЫРЫ

Шырылдаған халықтың жан айқайы, бодандық, аласапыран, қан төгіс... Ер мен ел намысының аяусыз жаншылуы... Бұл сұсты сөздер жинағы ретсіздікпен жиыла салған кездейсоқ әріптерден емес, еліміздің тәуелсіздік алуға дейінгі кешкен қасіретінен, аналарымыздың көз жасынан, батыр бабаларымыздың көлдей төгілген қанынан қалған қатпақ іздерден, ұлтымыздың басынан өткен, көмескіленген кескіндерінен тұрады.

Қазақтың Кеңес социалистік республикасы Қазақстан Республикасы болып өзгертілген мың да тоғыз жүз тоқсан бірдің он алтыншы желтоқсаны елдің еңсесін көтеріп, айбын асқақтатқан айтулы күн болып тарих беттерінде алтын әріптермен жазылып қалды. Қамауда қалған шарасыз құстай болса да ертеңі үшін еміреніп, қайсарлығынан таймаған қазақтың асқақ армандары мен сарқылмаған ерік-жігерінің жемісі бүгінде біздерге мұра болған – тәуелсіздік. Мұстафа Ататүрік өзінің бір сөзінде айтып өткендей «Шынжырларды балқытып, тәжбен тақты күйрететін күшті нұр – ұлттық егемендімізге қолымыз жетті».

Ғасырлардың қатпар-қатпар қойнауына көз жүгіртсек бұл күннің ел басына оңай ту салмағанын көреміз. Талайлардың тақымынан тер келтірмей сарсаңға салған саясат ісі өз дегенін істеп, еліміз бір пәсте бодан бола шықты. Дегенмен қанша жерден өзгеге тәуелді болса да бабаларымыз өзге ұлт құрамына енбеді, қазақшылығына қиянат қылмады. Дәстүрін, тілі мен дінін, тарихын желге ұшып, өткеннің өбінде кетуден сақтап қала білді. Қазақтан шыққан зиялы қауым өкілдері өз жаңын пида етіп, ел үшін қияда қаны төгілді.

«Бас кеспек болса да, тіл кеспек жоқ» деп ержүректікке салынған, қылшытың жүзінен қызыл тіл мен қаламның өткіррек екенін ойға оралтатын рухы батыр Абай, Мұхтар, Ыбырай сынды бабаларымыздан бастап, саясаттан сан қырын зерттеп, ел ертеңін қалай да жарқын етуге күш салған Әлихан, Мұстафа, Смағұл сынды аталарымыздың ұмытуға болмайтын ерен еңбектері арқасында біз – тәуелсіз Қазақстанның жас өрендері, өз елімізде, өз топырағымызда алаңсыз күн кешудеміз. Болашақта да қаймағымыз бұзылмай, ұлттық құндылықтарымызды сақтай отырып мәңгілік ел болуға ұмтыламыз. Тәуелсіз еліміздің тұңғыш президенті, елге ерен еңбегі сіңген Елбасымыз Н.Ә.Назарбаевтың келесі сөздері дәлел:

«...Уақыт қарқыны зымыран. Күні кеше өткен сияқты уақиғалар бүгінде тарих беттеріне айналп та үлгерді. Бұл жаңа мемлекет пен жаңа қоғамның дүниеге келуінің азатты толғаққа толы, сонымен бірге ғаламат сәті еді. Ең қыын жылдар дәл қазір артымызда қалды, сондықтан да мен еліміздің еңсесі биіктей беретініне сенемін».

Әл-Фараби атындағы ҚазҰУ, Шет тілдер кафедрасының
аға оқытушысы Жаримбетова Р.Н
Механика-математика факультетінің 1 курс студенті Ділдабек А.Б

ЖАҚСЫНЫҢ АТЫ ӨЛМЕЙДІ, ҒАЛЫМНЫҢ ХАТЫ ӨЛМЕЙДІ

2022 жылдың 10-желтоқсан күні жоғары оқу орнына дейінгі білім беру факультетінде тіл үйренуші шетелдік тыңдаушыларға әл-Фараби кітапханасында экскурсия ұйымдастырылды. Кітапхана қызметкері Көбегенова Құндыз кітапхана жайлы толық мәлімет беріп, таныстырды. Әл-Фараби кітапханасы университетпен бір уақытта құрылғанын 2014 жылдан бастап жаңа технологиялармен жабдықталған заманауи жаңа ғимаратқа көшкені жайлы мәліметтен бастады. Кітапхана университеттің өмірінен тығыз байланыста болатын шығармашылық, инновациялық кітапхана – оқуға, зерттеуге біріктірілген интеграцияланған; бүкіл әлем бойынша білімге қолжетімділікті қамтамасыз ету және университеттің зияткерлік активтерін таныпал етуді көздейтініне тоқталып өтті.

Шетелдік тіл үйренушілер XVI – XIX сирек кітаптар мен қолжазбалар сақталатын сирек кездесетін және құнды басылымдар залымен танысып, өз ойларымен бөлісті. Сонымен қатар ұлы ойшыл Абайдың 175 жылдығына орай ашылған Абай залы және 2017 жылы ашылған Тұңғыш Президент залымен танысты. «Жас ғалым» клубының мүшелері көрнекті ғалым, ҚР ҰҒА академигі, филология ғылымдарының докторы, профессор, шығыстанушы ғалым дипломат Әбсаттар Дербісәлінің 75 жылдығына орай әл-Фараби кітапханасында ашылған «Академик Әбсаттар Дербісәлі атындағы сирек кітаптар мен қолжазбалар» қорымен танысып, рухына тағзым етті.

Әл-Фараби кітапханасы университеттің ақпараттық, білім беру және мәдени орталығы, сапалы білім алуға барлық жағынан ықпал ететіндігі, сонымен қатар электрондық ресурстардың көптігі тыңдаушыларды таң қалдырды. Кітапханаға саяхат ұйымдастырған қызметкерлер мен ұстаздарына алғысын білдіріп, рақмет айтып тарасты.

Әл-Фараби атындағы Қазақ Ұлттық университетінің оқытушылары:
В.А.Габитова., З.А. Серикбаева



БАЛАБАҚШАДАҒЫ ЖАҢАШЫЛДЫҚ

Ел Президенті Қасым-Жомарт Тоқаев жаңа жылдық құттықтауында ресми түрде «Балалар жылын» жариялап, өскелең ұрпақтың жақсы өмір сүруі мемлекеттің басты міндеті екенін атап өткен еді.

«Жастарымыз атқарылып жатқан ауқымды жұмыстың, реформалардың игілігін міндетті түрде көреді. Олардың арасында көзі ашық, көкірегі ояу, ойы ұшқыр азаматтар аз емес. Біз өскелең ұрпаққа жол ашу үшін барлық жағдайды жасауымыз керек. Балалар – мемлекетіміздің жарқын болашағының кепілі. Сондықтан да алдағы жылды «Балалар жылы» деп жариялау керек деп есептеймін. Өңімізге жалаң ұран мен мерекелік шаралар туралы емес. Бірінші кезекте билік тарапынан балаларды қорғау үшін денсаулық сақтау, білім беру, әлеуметтік қолдау бағытында нақты шаралар қолға алынуы керек. Өскелең ұрпақтың үйлесімді дамуы мен бақытты балалық шағы – біздің жалпұлттық міндетіміз», – деді Мемлекет басшысы.

Осы орайда «Ойын – баланың алдынан өмір есігін ашып оның шығармашылық қабілетін дамытады, ойынсыз ақыл-ойдың қалыптасуы мүмкін емес» деп В.А.Сухомилинский айтқандай, мектепке дейінгі білім беру мекемелерінде 2022 жылы жаңартылған бағдарламаға сай, іс-әрекет түрлері бұрынғыдай партада емес, еркін, қызықты ойын түрінде жүргізіле бастады. Әр баланың жеке қабілетін ашуға, ойын еркін айтуға, ойнай жүріп дене жаттығуларын жасап, ой-өрістерін дамытып, жалықтырмай жақсы көңіл-күйде іс-әрекет етуде тәрбиеші ретінде зор мүмкіндік туды деп есептеймін.

«Балада ойынға деген құштарлық бар, оны тек қанағаттандыру керек» дейді Антон Макаренко. Расымен, физикалық қасиеттерді, коммуникативтік, танымдық және зияткерлік, шығармашылық, зерттеу іс-әрекеттерін, әлеуметтік-эмоционалды дағдыларды қалыптастырып, дамыту үлкен еңбекті талап етеді.

Мария Монтессоридің өзінің еркіндік түсінігін баланың үлкендердің еркіне тәуелді болмау деп түсіндірді. Бұл дегеніміз – баланың үлкендердің минималды көмегі арқылы өзіне қызмет етуі, жаңаны игере білуі, маңызды шешімді өзі қабылдауы мен баланың даралық құқығын қорғау болып табылады.

«Баланы тәрбиелеудің ең үлкені – оны еңбекке баулу. Еңбекшіл жас қана ең үлдік азамат болып қалыптасады» деп Әзілхан Нұршайықов айтпақшы. ойнай, тәрбиелей отырып, еңбекке баулуға да ұмытпаған жөн екенін ескереміз.

Қорыта келе, бала – болашағымыз. Ертеңгі еліміздің іргетасын қалау осы сәттен бастау алады. Ендеше, «Балалар жылындағы» ең маңызды өзгеріс осы болған шығар. Себебі ұрпақ тәрбиесі бірінші орында болғаны өте орынды. Ойнап отырып, ой ойлата алатын ойлы ұрпақ, саналы азамат тәрбиелеп шығарайық. Еліміздің ертеңі жарқын болғай!

Алматы қаласы 174 бөбекжай-балабақша
тәрбиешісі Мергүл АСЫЛХАНОВА

МЕН ТАҢДАҒАН ОҚУ ОРНЫ

Біз тәуелсіз қоғамда өмір сүріп жатқан тәуелсіз ұрпақтарымыз. Біздің білім алуға деген мүмкіндіктеріміз бен қол жеткізе алатын армандарымыз бен жетістіктеріміз мол. Еліміздегі озық жоғары оқу орындарының арасынан мен неге ҚазҰУ-ды таңдадым? Университет 1934 жылы құрылып, 1991 жылдан бастап Әл-Фараби атындағы Қазақ Ұлттық Университеті болып өзгертілгені университетінен хабардармыз. Университет сол кезеңнен бүгінге дейін тоқтаусыз дамып келеді. Әл-Фараби атындағы Қазақ Ұлттық Университетінің құрылғанына бүгінде бір ғасырға жуық уақыт болып та қалды. Әлемдік білім кеңістігінде өзіндік алар орны ерекше, көш бастап тұрған білім ордаларының бірі де бірегей дәл осы әл-Фараби атындағы Қазақ Ұлттық университеті дегім келеді. Университеттің тарихи еліміздің маңызды кезеңдерімен тұспа-тұс ұшырасады. Меніңше, ҚазҰУ-жастар мекені не жастардың қалашығы десек болады. Оның ең үлкен ерекшелігі – ауқымында. Себебі ҚазҰУ қалашығы өте үлкен, тіпті, бір үлкен ауыл деуге де болады. Мемлекет басшыларымыз «Болашақ бүгінгі жастардың қолында» десе, оқу орнында жастарға бүкіл жағдай жасалған. Көз жүгіртіп қарасақ, қалашық ортасында үлкен көлемдегі Әл-Фараби кітапханасы орналасқан. Іші қазіргі ғылым талабына сай цифрлы жүйемен толық қызмет көрсетеді. Кітапхана қойнауында 2 миллионнан астам кітап қоры бар. Ішінде сұраған кітаптың бәрін таба аламыз және де бір қуантатыны кітапхана электронды жүйеде жұмыс атқарады. Тағы да бір қызық жағдай, кітапхана ішінде тек кітап емес, компьютер клубы және шағын музейлер орналасқан. Әл-Фараби кітапханасы ТМД елдеріндегі алар орны ерекше, көлемді, ауқымы жалғыз кітапхана. Қалашықтың табиғаты мүлде ғажап. Ортадағы Әл-Фараби ескерткішінен аса бастағанда, ары қарай сұлу Алатаудың бейнесіне күә боламыз. ҚазҰУ қалашығының ішінде Өмірбек Жолдасбеков атындағы студенттер сарайы да бар. Ол да өзінің жұмысын қарқынды атқарады. Университеттің таланты жастарын осы жерден табамыз.

Ал егер университеттің білім сапасына келсек айтылар мадақтаулар өте көп. Университет халықаралық деңгейде білім беріп келді және алдағы уақытта да өз мәртебесін сақтап қалады. Мемлекеттік аттестаттаудан бірінші болып өтіп, барлық мамандық бойынша білім беру қызметін жүзеге асырып келеді. Факультет бойынша қарастырсақ онда том-том үлкен кітап жазып шығаруға тура келеді. ҚазҰУ - цифрландыру жүйесінің көшбасшысы. Себебі, әр жыл сайын университет өзіндік жаңа бағытты қалыптастыруда. Университетіміз үшін 2020 жыл да жақсы аяқталады деген үміттеміз. Себебі, 2020 жылғы университеттердің рейтингімен салыстырғанда тағы да Қазақ Ұлттық Университеті көш бастап тұр. ҚазҰУ-таланты жастар мен дарынды студенттердің, білімге құштар азаматтардың мекені. ҚазҰУ-нағыз студенттік шақтардың естен кетпес естеліктерін қалыптастырушысы десек те қателеспеспіз.

Ғылыми жетекші: Нурбакова Г.С.
теориялық және ядролық физика кафедрасының ф.-м.ғ.к.,
аға оқытушы, Магистрант: Молдрахым Гауһар Тойбазарқызы